



REPUBLIKA E KOSOVËS / REPUBLIKA KOSOVA

A.A.nr.9/2026

GJYKATA SUPREME E KOSOVËS, në kolegjin e përbërë nga gjyqtarët Franciska Zhitija - Ymeri, kryetare e kolegjit, Milena Djeric dhe Lumni Sallauka, anëtar të kolegjit, duke vendosur sipas ankesës së subjektit politik Nova Demokratska Stranka me seli në Prizren, për shpalljen e rezultateve përfundimtare të Zgjedhjeve të Parakohshme për Kuvend të Kosovës të mbajtura me datën 28 Dhjetor 2025, të paraqitur kundër vendimit të Panelit Zgjedhor për Ankesa dhe Parashtresa (PZAP), ZP.Anr.78/2026, të datës 03.02.2026, në seancën e mbajtur më datë 09.02.2026, merr këtë:

AKT GJYKIM

REFUZOHET ankesa e subjektit politik Nova Demokratska Stranka me seli në Prizren, ndërsa vendimi i Panelit Zgjedhor për Ankesa dhe Parashtresa (PZAP), ZP.Anr.78/2026, të datës 03.02.2026, VERTETOHET.

A r s y e t i m i

Panelit Zgjedhor për Ankesa dhe Parashtresa, me vendimin ZP.Anr.78/2026, të datës 03.02.2026, ka vendosur: Refuzohet e pabazuar ankesa ZP.Anr.78/2026, e datës 02.02.2026, e parashtruar nga subjekti politik Nova Demokratska Stranka me seli në Prizren, paraqitur kundër vendimit të Komisionit Qendror të Zgjedhjeve (KQZ), Nr. 01/156-2026 i datës 31.01.2026 për shpalljen e rezultateve përfundimtare të Zgjedhjeve të Parakohshme për Kuvend të Kosovës të mbajtura me datën 28 Dhjetor 2025.

Kundër vendimit të lartpërmendur, subjekti politik Nova Demokratska Stranka me seli në Prizren, ka paraqitur ankesë në Gjykatën Supreme të Kosovës, me të cilën e konteston ligjshmërinë e tij, duke propozuar që Gjykata Supreme e Kosovës të aprovojë ankesën, si të bazuar, të ndryshohet vendimi i PZAP, nr. ZP.Anr.78/2026, i datës 03.02.2026, ashtu që të anulohen votat e numëruara për subjektin politik "Za Slobodu, Pravdu i Opstanak" në kuadër të llogaritjes për mandatin e rezervuar të komunitetit boshnjak në këto vendvotime në Komunën e Prizrenit: a) 44 vota në vendvotimi nr. 2045 - Donje Ljubinja, b) 86 vota në vendvotimi nr. 2044 - Gornje Ljubinja, c) 45 vota në vendvotimi nr. 2049 - Grnčare dhe të urdhërohet Komisionin Qendror të Zgjedhjeve (KQZ) të korrigjojë rezultatin përfundimtar të Zgjedhjeve të Jashtëzakonshme të 28 dhjetorit 2025, duke përjashtuar nga llogaritja për mandatin e



rezervuar boshnjak votat e lartpërmendura, dhe të rivendosë integritetin e përfaqësimit të komuniteteve jo-shumicë në përputhje me Kushtetutën dhe standardet zgjedhore.

PZAP, në përgjigje në ankesën e paraqitur të subjektit politik Nova Demokratska Stranka, kundër vendimit të tij të lartpërmendur, i kontestoi në tërësi thëniet ankimore dhe propozoi që ankesa të refuzohet si e pabazuar, ndërsa të vërtetohet vendimi ZP.Anr.78/2026, i datës 03.02.2026.

Gjykata Supreme e Kosovës e vlerësoi ligjshmërinë e vendimit të kontestuar, në kuptim të pretendimeve ankimore, përgjigjes në ankesë, dhe pas shqyrtimit edhe të shkresave të lëndës, gjeti se:

Ankesa është e pabazuar.

Nga shkresat e lëndës rezulton se më datë 02.02.2026, PZAP-i, ka pranuar ankesën ZP.Anr.78/2026 nga subjekti politik Nova Demokratska Stranka me seli në Prizren, paraqitur kundër vendimit të KQZ-së, Nr. 01/156-2026 i datës 31.01.2026 për shpalljen e rezultateve përfundimtare të Zgjedhjeve të Parakohshme për Kuvend të Kosovës të mbajtura me datën 28 Dhjetor 2025, në të cilën thekson se subjektit politik Za Slobodu Pravdu i Opstanak në mënyrë të çrregullt ka fituar vota në lokalitetet zgjedhore ku nuk ka anëtarë të komunitetit serb, dhe se ka dyshim në përllogaritjen e votave për subjektin politik - Stranka za slobodu, pravdu i opstanak në mjedise pa anëtarë të komunitetit serb (fshatra boshnjake të Komunës së Prizrenit). Me këtë veprim ka shkelur Kushtetutën e Republikës së Kosovës për vendet e garantuara në Kuvendin e Kosovës, duke kërkuar më saktësisht si në ankesë.

Komisioni Qendror i Zgjedhjeve ka ushtruar përgjigje në ankesë, me të cilën e ka kundërshtuar në tërësi ankesën e subjektit politik Nova Demokratska Stranka.

Pas pranimi të përgjigjes në ankesë të Komisionit Qendror të Zgjedhjeve, PZAP-i, ka nxjerr vendimin ZP.Anr.78/2026, të datës 03.02.2026, me të cilën e ka refuzuar ankesën e subjektit politik Nova Demokratska Stranka, duke vendosur si në dispozitiv të vendimit.

PZAP, në arsyetim të vendimit të saj ndër të tjera ka theksuar se: Pretendimet ankimore të parashtreses së ankesës se sipas rezultateve zyrtare të KQZ-së, subjekti politik Za Slobodu Pravdu i Opstanak, në mënyrë të çrregullt ka fituar vota në zonat ku nuk ka anëtarë të komunitetit serb, dhe se e njëjta ka arritur numrin e votave në mjediset boshnjake të Komunës së Prizrenit, përkatësisht në vendet e votimit: 2045 - Donje Ljubinje - 44 vota, 2044-Gornje Ljubinje - 86 vota, 2049 - Grnčare - 45 vota, sipas vlerësimit të panelit janë të pabazuara, për faktin se e drejta e votës ka dy parime kryesore barazinë dhe fshehtësinë e saj dhe lista e votuesve nuk përmban të dhëna për përkatësinë etnike të votuesve për shkak se do të mund të cenohen këto parime.

Paneli vlerëson se sipas Ligjit për Zgjedhjet e Përgjithshme në Kosovë, Lista e votuesve nuk përmban të dhëna për komunitetet etnike në Kosovë, rrjedhimisht KQZ nuk bën grumbullim apo përpunim të dhënash për etnitetin e votuesve përkatësisht të votimit. Andaj për Panelin këto pretendime janë ta pabazuara duke iu referuar nenit 6 par. 2 i LZP-së, që parasheh se: "Vota është personale, e barabartë, e lirë dhe e fshehtë", duke mos paragjykuar se si një votues zgjedhë të votojë një subjekt politik të caktuar.



Ka shtuar se Paneli sqaron se në kuadër të sistemit aktual zgjedhor në Republikën e Kosovës nuk ka asnjë bazë ligjore mbi bazën e të cilës do të mund të shpallen të pavlefshme fletëvotime në vendvotime të caktuara duke u bazuar mbi supozime për përkatësinë etnike të votuesve, përfshirë proporcionin në mes numrit të fletëvotimeve që mund të ketë fituar një parti, koalicion, nismë qytetare dhe kandidat i pavarur që deklaron që përfaqëson një komunitet dhe numrit të kalkuluar të votuesve të të njëjtit komunitet në vendvotime të caktuara, bazat përkatëse ligjore dhe mënyra e shpalljes së votave të pavlefshme është specifikisht e përcaktuar në Ligjin për Zgjedhjet e Përgjithshme dhe Rregullores Zgjedhore Nr. 12/2024 të aplikueshme në rastin konkret. Paneli thekson se bazuar në ligjet e aplikueshme të Republikës së Kosovës, shpallja e pavlefshme e votave, duhet të jetë e bazuar në bazë të qartë ligjore.

Po ashtu me dispozitën e nenit 45.1 të Kushtetutës së Republikës së Kosovës është paraparë që: “Çdo shtetas i Republikës së Kosovës që ka arritur moshën tetëmbëdhjetë vjeç, qoftë edhe ditën e zgjedhjeve, gëzon të drejtën të zgjedhë dhe të zgjedhet, me përjashtim kur kjo e drejtë i kufizohet me vendim gjyqësor”. Ndërsa paragrafi 2 i po të njëjtit nen parasheh që: “Vota është personale, e barabartë, e lirë dhe e fshehtë”. Në rastin konkret Paneli nuk mund të pranojë një pretendim dhe një kërkesë të tillë që të anulohen zgjedhjet dhe të shpallen të pavlefshme fletëvotimeve pa bazë të saktë ligjore, pasi që çdo shpallje e pavlefshme e fletëvotimeve duhet të jetë e bazuar dhe të ketë mbështetje ligjore, kërkesë kjo që buron edhe nga vet Ligji për Zgjedhjet e Përgjithshme, dhe rregullativa e KQZ-së, për të anuluar zgjedhjet dhe për të shpallur të pavlefshme fletëvotime.

Për një situatë të tillë, ka edhe praktikë nga ana e Gjykatës Kushtetuese e Republikës së Kosovës, e cila me aktgjykimin në rastin K169/2021, ndër të tjera ka sqaruar se: Gjykata rikujton që sipas GJENDJ-së (i) nuk është detyrë e gjykatave që të përcaktojnë vullnetin e votuesve, përfshirë përmes shpalljes së pavlefshme të fletëvotimeve pa bazë të saktë dhe (ii) çdo shpallje e pavlefshme e fletëvotimeve duhet të jetë e bazuar në bazë të saktë ligjore, kërkesë kjo që buron edhe nga vet Ligji për Zgjedhjet e Përgjithshme dhe Rregullativa e KQZ-së në kontekst të kompetencës së PZAP-së, për të anuluar/shpallur të pavlefshme fletëvotime.

Paneli rithekson që vota në Republikën e Kosovës është personale, e barabartë, e lirë dhe e fshehtë dhe si e tillë nuk mund të anulohet/shpallet e pavlefshme bazuar në përkatësi etnike të votuesit, sepse as Ligji dhe as Rregullativa e KQZ-së, nuk përcaktojnë asnjë kriter tjetër mbi bazën e të cilit mund të shpallen të pavlefshme fletëvotimet dhe aq më pak kriter të bazuar në përkatësi etnike të votuesve. Po ashtu sipas vlerësimit të panelit kërkesa për anulim të votave, përkatësisht shpalljes së pavlefshme të fletëvotimeve në VV: 2045 - Donje Ljubinje - 44 vota, 2044-Gornje Ljubinje-86 vota, 2049-Grnçare-45 vota, është e pa bazë edhe për faktin se ky rezultat zgjedhor nuk ka rezultuar në cenimin e të drejtave të parashtruesit të kërkesës për t'u zgjedhur deputet i Kuvendit të Kosovës siç është e garantuar përmes paragrafit 1 të nenit 45 të Kushtetutës së Republikës së Kosovës.

Gjykata Supreme e Kosovës, duke u nisur nga gjendja e tillë faktike dhe ligjore e çështjes, e pranon në tërësi si të drejtë dhe të bazuar qëndrimin juridik të PZAP-it, si në vendimin e tij, me të cilin e ka refuzuar si të pabazuar ankesën e parashtruar nga subjekti politik Nova Demokratska Stranka, lidhur me pretendimet se subjekti politik Za Slobodu Pravdu i Opstanak në mënyrë të çrregullt ka fituar vota në lokalitetet zgjedhore ku nuk ka anëtarë të komunitetit serb, dhe se ka dyshim në përllogaritjen e votave për subjektin politik - Stranka za slobodu,



pravdu i opstanak në mjedise pa anëtarë të komunitetit serb (fshatra boshnjake të Komunës së Prizrenit).

Gjykata Supreme e Kosovës, e pranojë si të drejtë dhe të ligjshëm vendimin e PZAP-së edhe për zbatim të së drejtës materiale për arsye se:

Me nenin 6 paragrafi 1, 2 dhe 3 të Ligjit nr.08/L-228 për Zgjedhjet e Përgjithshme në Republikën e Kosovës, përcaktohet se: *"1. Çdo shtetas i Republikës së Kosovës që ka arritur moshën tetëmbëdhjetë (18) vjeç, qoftë edhe ditën e zgjedhjeve, gëzon të drejtën të zgjedhë dhe të zgjedhet. 2. Vota është personale, e barabartë, e lirë dhe e fshehtë. 3. E drejta e votës mund të kufizohet me vendim gjyqësor."*

Me nenin 117 paragrafi 1, 3 dhe 4 të këtij ligji përcaktohet se: *"1. PZAP-ja miraton akt të veçantë për procedurat e parashtrimit dhe vendosjes së ankesave nga palët e autorizuara, siç përcaktohet me dispozitat e këtij ligji. 3. Vendosja për ankesat nga PZAP-ja mbështetet në dëshmi të qarta dhe bindëse. 4. PZAP-ja mund të urdhërojë rinumërimin e fletëvotimeve në një vendvotim apo qendër votimi si dhe shqyrtimin e materialit votues si pjesë të hetimeve për ankesën e parashtruar"*.

Me nenin 120 paragrafi 1 pika 1.1, 1.2 dhe 1.3 të këtij ligji përcaktohet se: *"1. Në rast se PZAP përcakton se ka ndodhur shkelje e këtij ligji ose e rregullave të KQZ-së, mundet të: 1.1. urdhërojë një subjekt politik ose një organizatë vëzhguese të ndërmarrë masa përmirësuese; 1.2. para certifikimit të rezultateve zgjedhore, është në kompetencë të PZAP-së, në raste të jashtëzakonshme të anulojë rezultatet në një vendvotim apo qendër votimi, dhe ta urdhërojë KQZ të përsërisë votimin në një qendër votimi apo vendvotim, nëse konsideron se ka ndikim në rezultatet finale; dhe 1.3. të vendosë një gjobë ndaj një subjekti politik, në vlerë deri në pesëdhjetëmijë (50,000 €) Euro."*

Me nenin 45 paragrafi 1, 2 dhe 3 të Kushtetutës së Republikës së Kosovës, përcaktohet se: *1. Çdo shtetas i Republikës së Kosovës që ka arritur moshën tetëmbëdhjetë vjeç, qoftë edhe ditën e zgjedhjeve, gëzon të drejtën të zgjedhë dhe të zgjidhet, me përjashtim kur kjo e drejtë i kufizohet me vendim gjyqësor. 2. Vota është personale, e barabartë, e lirë dhe e fshehtë. 3. Institucionet shtetërore mbështesin mundësitë për pjesëmarrjen e çdonjërit në aktivitete publike dhe të drejtën e secilit për të ndikuar në mënyrë demokratike në vendimet e organeve publike"*.

Me nenin 16 paragrafi 1 dhe 2 të Rregullores zgjedhore Nr. 12/2024 Votimi, Numërimi në Vendvotim dhe Menaxhimi i Vendvotimit, përcaktohet se: *"1. Fletëvotimi konsiderohet i vlefshëm nëse: 1.1. Është i vulosur; 1.2. ka numrin serik të VV përkatës. 2. Vota është e vlefshme, kur votohet vetëm një subjekt politik dhe kuptohet qartë qëllimi i votuesit: 2.1. në zgjedhjet për Kuvendin e Kosovës, vota konsiderohet e vlefshme nëse votuesi ka votuar për një (1) subjekt politik; 2.2. në zgjedhjet për Kuvendin e Kosovës, vota konsiderohet e pavlefshme, në rastet kur: 2.2.1. Kur votohet më shumë se një subjekt politik; 2.2.2. kur nuk votohet asnjë subjekt politik; 2.2.3. kur votohen vetëm kandidatët dhe jo subjekti politik; 2.2.4. kur qëllimi i votuesit nuk është i qartë, sipas procedurave të votimit dhe numërimit në vendvotim."*

Gjykata Supreme e Kosovës, nga shqyrtimi i shkresave dhe nga dispozita e lartcekur, erdhi në përfundim se ankesa e ankuesit është e pabazuar, ndërsa vendimi i PZAP-së është i drejtë dhe i ligjshëm. Në rastin konkret bazuar në dispozitën ligjore nga neni 6 paragrafi 1, 2 dhe 3, 117



dhe 120 të Ligjit nr.08/L-228 për Zgjedhjet e Përgjithshme në Republikën e Kosovës, rezulton fakti se kërkesa që të anulohen votat e numëruara për subjektin politik “Za Slobodu, Pravdu i Opstanak” në kuadër të llogaritjes për mandatin e rezervuar të komunitetit boshnjak në këto vendvotime në Komunën e Prizrenit: a) 44 vota në vendvotimi nr. 2045 - Donje Ljubinjje, b) 86 vota në vendvotimi nr. 2044 - Gornje Ljubinjje, c) 45 vota në vendvotimi nr. 2049 – Grnčare, është e pabazuar.

Gjykata Supreme e Kosovës vlerëson se PZAP, drejt ka vendosur lidhur me ankesën e ankuesit dhe në mënyrë të drejtë i është referuar aktgjykimit në rastin K169/2021 të Gjykatës Kushtetuese të Kosovës, për faktin se përveç pjesës të cilës i është referuar PZAP, Gjykata Kushtetuese në mënyrë të qartë ka sqaruar faktin se, kriteret mbi bazën e të cilave votat mund të shpallen të pavlefshme, janë të përcaktuara në rregullativën e KQZ-së, dhe me dispozitat ligjore të ligjit për zgjedhjet e përgjithshme dhe se këto rregulla duhet të zbatohen në mënyrë strikte lidhur me anulimin e votave të kontestuara.

Përveç të cekurave Gjykata Kushtetuese e Kosovës ka sqaruar faktin se, në kuadër të sistemit aktual zgjedhor në Republikën e Kosovës nuk ka asnjë bazë ligjore mbi bazën e të cilës do të mund të shpallen të pavlefshme fletëvotime në vendvotime të caktuara duke u bazuar mbi supozime për përkatësinë etnike të votuesve përfshirë proporcionin në mes numrit të fletëvotimeve që mund të ketë fituar një parti, koalicion, nismë qytetare dhe kandidat i pavarur që deklaroi që përfaqëson një komunitet dhe numrit të kalkuluar të votuesve të të njëjtit komunitet në vendvotime të caktuara. Gjykata rikujton që sipas GJENDJ-së (i) nuk është detyrë e gjykatave që të përcaktojnë vullnetin e votuesve, përfshirë përmes shpalljes së pavlefshme të fletëvotimeve pa bazë të saktë ligjore; dhe (ii) çdo shpallje e pavlefshme e fletëvotimeve duhet të jetë e bazuar në bazë të saktë ligjore, kërkesë kjo që buron edhe nga vet Ligji për Zgjedhjet e Përgjithshme dhe rregullativa e KQZ-së në kontekst të kompetencës së PZAP-së, për të anuluar/shpallur të pavlefshme fletëvotime.

Gjykata Supreme e Kosovës vlerëson se bazuar në dispozita ligjore dhe rregullat zgjedhore të lartcekura të cilat përcaktojnë qartë mënyrën se kur konsiderohet një fletëvotim i pavlefshëm, rezultoi fakti nuk përmbushet asnjëri nga elementet e përcaktuar me rregulloren zgjedhore Nr.12/2024 Votimi, Numërimi në Vendvotim dhe Menaxhimi i Vendvotimit, për pavlefshmërinë e fletëvotimeve për faktin se fletëvotimi është i vulosur; përmban numrin serik të VV përkatës, është votuar vetëm një subjekt politik dhe është kuptuar qartë qëllimi i votuesit, votuesi ka votuar për një (1) subjekt politik, në zgjedhjet për Kuvendin e Kosovës. Prandaj duke pas parasysh se nuk plotësohet asnjë nga kushtet për pavlefshmërinë e fletëvotimit të përcaktuar me neni 2 të kësaj rregulle zgjedhore kjo gjykatë erdhi në përfundim se ankesa e ankuesit është e pabazuar.

Përveç të cekurave kjo gjykatë vlerëson se anulimi i votave nuk mund të mbështetet vetëm mbi pretendime të përgjithshme se kandidatët kanë marrë vota nga votues që nuk i përkasin minoritetit përkatës. Një qasje e tillë bie ndesh me parimet themelore të së drejtës së votës, si vota e lirë, e fshehtë dhe e barabartë. Ligji zgjedhor nuk e kushtëzon vlefshmërinë e votës me përkatësinë etnike të votuesit, por me faktin që ai është i regjistruar ligjërisht dhe ka ushtruar të drejtën e tij në përputhje me procedurat e përcaktuara.



Për më tepër, pretendimet e pambështetura me prova konkrete nuk mund të shërbejnë si bazë për një masë kaq ekstreme sa anulimi i votave, pasi kjo do të cenonte sigurinë juridike dhe besimin e qytetarëve në procesin zgjedhor. Pranimi i një standardi të tillë do të krijonte një precedent të rrezikshëm, ku rezultati zgjedhor mund të vihet në dyshim thjesht mbi perceptime apo supozime subjektive.

Anulimi i votave në këto rrethana do të rrezikonte gjithashtu përfaqësimin e vetë minoriteteve, pasi do të kufizonte lirinë e tyre për të marrë mbështetje më të gjerë qytetare dhe do t'i izolonte ato politikisht. Përfaqësimi efektiv i minoriteteve nuk arrihet duke përjashtuar vota të ligjshme, por duke garantuar një proces gjithëpërfshirës, të drejtë dhe jo-diskriminues, ku çdo votë e vlefshme ka peshë të barabartë.

Në këtë kuptim, vetëm shkeljet e provuara qartë dhe që kanë ndikuar drejtpërdrejt në rezultatin zgjedhor mund të justifikojnë ndërhyrje në rezultatin e votimit, ndërsa thjesht fakti se votuesit i përkasin ose jo një minoriteti të caktuar nuk përbën, në vetvete, bazë ligjore për anulimin e votave.

Andaj, anulimi i votave vetëm mbi bazën e pretendimeve se kandidatët e një minoriteti kanë marrë mbështetje edhe nga votues që nuk i përkasin atij minoriteti përbën shkelje të drejtpërdrejtë të parimeve kushtetuese që garantojnë të drejtën e votës dhe barazinë para ligjit. Kushtetuta garanton të drejtën e çdo shtetasi për të zgjedhur dhe për t'u zgjedhur, pa asnjë diskriminim, si dhe parimin e votës së lirë, të barabartë dhe të fshehtë. Çdo përpjekje për të vënë në dyshim vlefshmërinë e votës bazuar në përkatësinë etnike të votuesit cenon thelbin e këtyre garancive dhe krijon trajtim të pabarabartë ndërmjet qytetarëve.

Gjithashtu, Kushtetuta ndalon çdo formë diskriminimi mbi baza etnike apo komunitare. Kushtëzimi i efektit juridik të votës me identitetin e votuesit do të thotë vendosje e kriterëve që ligji nuk i njeh dhe që bien ndesh me parimin e proporcionalitetit, pasi masa e anulimit të votave është e pajustificuar dhe joproporcionale në raport me pretendime të paprovuara.

Gjithashtu edhe në të drejtën ndërkombëtare, standardet e vendosura nga Konventa Evropiane për të Drejtat e Njeriut, veçanërisht Protokolli nr. 1, neni 3, kërkojnë që zgjedhjet të zhvillohen në kushte që garantojnë shprehjen e lirë të opinionit të popullit. Jurisprudenca e Gjykatës Evropiane për të Drejtat e Njeriut ka theksuar se çdo kufizim i së drejtës së votës duhet të jetë i parashikuar me ligj, të ndjekë një qëllim legjitim dhe të jetë proporcional. Anulimi i votave mbi baza etnike nuk përmbush asnjë nga këto kriterë.

Po ashtu, Pakti Ndërkombëtar për të Drejtat Civile dhe Politike garanton të drejtën e çdo qytetari për të marrë pjesë në drejtimin e çështjeve publike dhe për të votuar pa dallim. Komiteti për të Drejtat e Njeriut ka theksuar se masat që kufizojnë pjesëmarrjen politike të grupeve të caktuara duhet të interpretohen ngushtë dhe të justifikohen me arsye objektive dhe të verifikueshme.

Prandaj, në vend që të forcojë përfaqësimin e minoriteteve, një praktikë e tillë do të kishte efekt të kundërt do të stigmatizonte kandidatët e minoriteteve, do të kufizonte mbështetjen e tyre demokratike dhe do të minonte integritimin politik dhe shoqëror. Përfaqësimi real i minoriteteve, sipas standardeve kushtetuese dhe ndërkombëtare, synon pjesëmarrje të barabartë dhe efektive në jetën politike, jo izolim elektoral apo trajtim të veçantë diskriminues.



Si rezultat i kësaj, vetëm shkeljet e provuara, konkrete dhe të rënda që cenojnë integritetin e procesit zgjedhor mund të justifikojnë ndërhyrje në rezultatin e votimit. Pretendimet mbi përkatësinë etnike të votuesve, në mungesë të një ndalimi ligjor dhe të provave të qarta, nuk përbëjnë bazë kushtetuese apo ndërkombëtare për anulimin e votave.

Në raport me pretendimet e ankuesit se PZAP, nuk i ka trajtuar fare çështjen në aspektin e shkeljeve kushtetuese nga neni 58 dhe 64, Gjykata Supreme e Kosovës, këtë pretendim e refuzon si të pabazuar.

Gjykata Supreme e Kosovës vlerëson se kjo qasje nuk bie ndesh me nenin 45 të Kushtetutës, i cili garanton të drejtën e çdo shtetasi për të zgjedhur dhe për t'u zgjedhur. Përkundrazi, anulimi i votave mbi bazën e përkatësisë etnike të votuesve do të përbënte vetë një shkelje të këtij neni, pasi do të kufizonte në mënyrë të pajustificuar ushtrimin e së drejtës së votës nga qytetarë që e kanë ushtruar atë në mënyrë të ligjshme. Neni 45 nuk parashikon asnjë kufizim që e lidh vlefshmërinë e votës me identitetin etnik të votuesit, prandaj çdo interpretim i tillë do të ishte zgjerues dhe në kundërshtim me frymën e tij.

Gjithashtu, kjo qasje është në përputhje me nenin 58 të Kushtetutës, i cili garanton mbrojtjen e minoriteteve kombëtare dhe të drejtën e tyre për të shprehur, ruajtur dhe zhvilluar identitetin e tyre. Ky nen synon sigurimin e kushteve që minoritetet të marrin pjesë në mënyrë të barabartë në jetën publike dhe politike, jo izolimin e tyre nga mbështetja më e gjerë qytetare. Marrja e votave edhe nga votues që nuk i përkasin minoritetit nuk cenon identitetin apo të drejtat e minoritetit, por dëshmon integritim dhe pjesëmarrje efektive, në përputhje me qëllimin e këtij neni.

Po ashtu, vendimi i PZAP-së, nuk bie ndesh me nenin 64 të Kushtetutës, i cili rregullon përbërjen e Kuvendit dhe parashikon mekanizma për garantimin e përfaqësimit të minoriteteve. Qëllimi i këtij neni është të sigurojë përfaqësim minimal dhe efektiv të minoriteteve në Kuvend, jo të kufizojë lirinë e votës së qytetarëve apo të imponojë një "elektorat etnik të mbyllur". Përfaqësimi i garantuar sipas nenit 64 nuk përjashton dhe as ndalon që kandidatët e minoriteteve të marrin mbështetje edhe nga votues të tjerë, përkundrazi, ai bashkëjeton me parimin e zgjedhjeve të lira dhe konkurruese.

Në këtë kuptim, interpretimi sipas të cilit votat duhet të anulohen sepse janë dhënë nga votues që nuk i përkasin minoritetit do të ishte në kundërshtim me nenet 45, 58 dhe 64 të Kushtetutës. Këto dispozita, të lexuara së bashku dhe në harmoni me parimet kushtetuese të barazisë, mosdiskriminimit dhe proporcionalitetit, mbështesin vlefshmërinë e çdo vote të ligjshme dhe synojnë përfaqësim gjithëpërfshirës, jo përjashtues.

Andaj, nga theksimet si më lartë dhe në bazë të nenit 118 paragraf 4, të Ligjit për Zgjedhjet e Përgjithshme në Republikën e Kosovës, u vendos si në dispozitiv të këtij aktgjykimi.

GJYKATA SUPREME E KOSOVËS

AA.nr.9/2026, datë 09.02.2026.



Kryetarja e kolegjit,
Republika e Kosovës
Franciska Zhitija Ymeri

SAKTËSINË E KOPJËS E VËRTETON
TAČNOST OTPRAVKA POTVRDUJE

Punëtori i autorizuar
Ovlašćen radnik



REPUBLIKA E KOSOVËS / REPUBLIKA KOSOVA / REPUBLIC OF KOSOVO
KËSHILLA E GJYKËSORË E KOSOVËS / SUBSKI SAVET KOSOVO / KOSOVO JUDICIAL COUNCIL



GJYKATA SUPREME E KOSOVËS

SEKRETARIATI I KËSHILLIT GJYKËSOR TË KOSOVËS

Sheji i shkresës
Oznaka spisa:

AA-9/2026

FLETËDËRGESË PËR DORËZIM PERSONAL

DOSTAVNICA ZA LICNO DOSTAVLANJE

PZAP - PRISHITINE

1. Pasi marrësi, i cili me lehtësim e parë të dorëzimit nuk u gjel në vendin e ku është dëshitë të bëhet dorëzimi i sa pas lehtës së lehtësimit me shkrim që për shkak të dorëzimit të gjendet në kohën e caktuar në bancesën apo në vendin e punës se tij, dorëzimi është bërë: anëtarit mëdhor të familjes së marrësit - kujdestarit të ndërsesës, figur, personit që punon po në atë vend me marrësin.

1. Pasi primilac, koji pri prvom pokušaju dostave nije zatecen na mestu gde se dostavljanje ina izvršiti ni posle ostavljenog pismenog obavještenja da radi dostavljanja bude u određeno vreme u svom stani radnom mestu, dostava je izvršena: odraslom članu domaćina. Primac na sopniiku zgrade susedu licu zaposlenom na istom radnom mestu primocem

2. Pasi marrësi ose anëtarit i familjes së tij e refuzon marrjen e shkresës, shkresa u la në bancesë në vendin e punës së marrësit (duke e ngjitur në dritën e bancesës ose të lokalit ku gjendet në punë marrësi).

2. Pasi primilac odnosno član njenog domaćinstva odbio prijem, pismo je dostavljeno u stani - radnom mestu primaca (pribeho na vratima stana odnosno prostorije gde primilac zaposlen)

Më _____ 201 _____ në orën _____ u _____ cas.

Shkaku i refuzimit të marrjes _____

Razlog odbijanja prijma _____

Nënshkrimi i dorëzuesit - polipis dostavljaoca

Nënshkrimi i dorëzuesit - polipis dostavljaoca

Emri i shkresës që dorëzohet:
Naslov pisma koja se dostavlja:

AKTIVITETI

03.02.2026

Numri i shkojave: _____
broj priloga _____

Vërtetohet se mora shkresën e lartëpërmendur
më (me fjalë)
Povrđeno prijem gorenavenog pisma
(i slovima)

Priloga 03.02.2026

(Nënshkrimi i marrësit ose i atij që
e ka marrë aktin në vend të tij
Pecis primaca ili licu koje je
pismeno primilo u zameu)

Në rast se marrësi është analfabet ose nuk është në gjendje të nënshkruajë dorëzuesit, duke shkruar shkaku pse marrësi nuk e ka vënë nënshkrimin e vet. Ako je primilac nepismen ili nije u stanju da se potpiše, potpisuje ga dostavljae, napomenom zasto primilac nije stavio svoj potpis.